

արիւնալից դէպքերի առաջն առնել և Ագրբէջանի կառավարութիւնը հեռու պահել թիւրք դործակալների գծած ծրագրներից:

Երկար ժամանակից ի վեր նախապատրաստւած յառաջխաղացումը Ղարաբաղի վրա կատարւեց, հայ ազգաբնակչութիւնը ահագին զոհեր տւեց ջարդին և միայն տեղական ուժերով կազմակերպւած և սահմանափակ քանակութեամբ զէնքի տէր հայ զիւղացիները ստիպւած էին դիմել ինքնապաշտպանութեան՝ ապահովելու համար իրենց Ֆիզիքական գոյութիւնը:

Հայկական կառավարութիւնը այժմ էլ յայտարարում է, որ Ղարաբաղում հայկական կանոնաւոր զօրք չկայ բնաւ: Կանգնած լինելով համաձայնութեան և բոլոր վիճելի հարցերը խաղաղութեամբ լուծելու տեսակետի վրա, բոլոր զինւած ընդհարումները Հայաստանի Հանրապետութեան և նրա հարեանների քաղաքական ու տնտեսական շահերի համար նկատելով կործանարար՝ յայտարարում է, որ Ագրբէջանի նկատմամբ յարձակողական քայլերի դիմելու մտադիր չէ, ինչպէս որ այդ մասին քանիցս յայտարարել է թէ դաշնակիցներին և թէ խորհրդաժողովի անւան ուղարկած հեռագրներով: Կառավարութիւնը յայտարարում է, որ Հայաստանի զօրքերը Ագրբէջանի սահմանակից հողի վրա դրաւած դիրքերից առաջ չեն շարժւի՝ Ագրբէջանի վրա յարձակելու նպատակով:

Հայաստանի կառավարութիւնը այս խաղաղասիրութեան հետ միաժամանակ միանշանակ անհրաժեշտ է համարում Ղարաբաղի և Ագրբէջանի կից հողերի հայ ազգաբնակչութեան ապահովութեան անհրաժեշտ երաշխիքը Ղարաբաղի, Նուխու, Շամախու, Արէշի, Զաքաթալայի և այլ տեղերում մինչև այժմս էլ Ագրբէջանի սահմաններում ապրող թիւրք փաշաների և սպաների կազմակերպած նման արիւնհեղութիւններին վերջ տալու համար: Այդ երաշխիքները ձեզ հետ միասին կը մշակէ մեր պատգամաւորութիւնը, որ Թիֆլիսումն է»:

Չնայած, որ մենք տւինք երաշխաւորութիւն, որ Հայաստանի կողմից ոչ մի յարձակում Ագրբէջանի վրա չի կարող լինել, այնուամենայնիւ, Ագրբէջանը իր զօրքերը չտարաւ Ղարաբաղից և չէր էլ կարող տանել, որովհետև ապրիլ 28-ին արդէն յայտարարւած էր խորհրդային իշխանութիւն:

Ապրիլ 30-ին, Ագրբէջանի խորհրդային իշխանութեան կամ ռազմա-յեղափոխական կոմիտէի ներկայացուցիչներից մէկը՝ Համիդ Սուլթանով հազորդում է իր մի բարեկամին, թէ կարմիր զօրքը գրաւելով Նւխու՝ շարժւում է Շուշի, Ղարաբաղի վրայով միանալու Տաճկաստանին և միաժամանակ յայտնում է, որ Վրաստանն իրենց վախ չի ներշնչում, իսկ եթէ Հայաստանը դիմադրութիւն ցոյց տայ, հարկադրւած կը լինեն պատերազմ յայտարարել:

Այս հեռագիրը, որի պատճէնն ունենք մեր ձեռքի տակ, պարզ ցոյց է տալիս Ագրբէջանում տեղի ունեցած դէպքերի իսկական բնոյթը: Կառավարութիւնը հարկ համարեց մի նօտայով դիմել Ագրբէջանի նոր կառավարութեան ներկայացուցիչ Նարիմանովին ու միաժամանակ խորհրդային Ռուսաստանի արտաքին գործերի կոմիսար Չիչերինին՝ պարզելու թէ ի՞նչ է կատարւում իսկապէս: Ահա այդ նօտան.

«Բագու, Ժողկոմխորհի նախագահ Նարիման Նարիմանովին, պատճէն Հայաստանի ներկայացուցիչ Մ. Յարութիւնեանին. —

Երևան, 29 ապր. — Ինչպէս ձեզ յայտնի է, դեռ Անդրկովկասեան հանրապետութիւնների կազմակերպման սկզբից իսկ Ագրբէջանի նախկին մուսաւաթական կառավարութիւնը քանիցս փորձեց զէնքի ուժով խլել Հայկական Ղարաբաղը և Զանգեզուրը հակառակ զիւղացիական պատգամաւորների 8 համագումարների յայտարարած վճիռների: Նոյն այդ կառավարու-